

Boodskap
Sondag 15 Augustus 2004

Verbeel jou jy ontvang 'n wonderlike geskenk: 'n trommel vol wonderlikhede – alles waarvan jy hou. Jou asem slaan weg as jy dit oopmaak. Jy kan beswaarlik glo wat alles daarin is! Iemand wat jou baie, baie goed ken, het moeite gedoen om alles waarvan jy hou en wat jy nodig het, sorgvuldig uit te kies en vir jou bymekaar te maak.

Gestel nou jy neem die een ding wat heel bo op lê en jy haal dit uit en dan maak jy die trommel toe en jy bêre dit diep weg en kyk nooit weer daarna nie.

Maak dit sin?

Ek hoop u sal met my saamstem: NEE!

Wel, baie Christene maak so met God se geskenke. God gee só baie vir ons! 'n Trommel vol wonderlikhede. Alles wat ons nodig het. Al wat ons moet doen is om dit uit te pak en te gebruik en dit sal ons lewens onmeetbaar verryk. Maar so dikwels gebeur dit dat ons net die boonste paar goedjies uitpak en dan nooit weer na die res van dit wat in die trommel is kyk nie.

Dit maak nie sin nie, né?

Iets hiervan gee die skrywer van die Hebreër-brief weer in Hebr 5:11 e.v.

¹¹ In verband hiermee het ons baie te sê wat moeilik is om aan julle te verduidelik, aangesien julle so traag is om te leer. ¹² Hoewel julle teen hierdie tyd self reeds

onderrig behoort te gee, het julle weer nodig dat iemand julle in die grondwaarhede van die woord van God moet onderrig. 'n Mens moet julle met melk voed en nie met vaste kos nie. ¹³ Iemand wat nog van melk lewe, kan nie saampraat oor wat reg of verkeerd is nie, want hy is nog 'n kind. ¹⁴ Vaste kos is vir grootmense, vir mense wat oor insig beskik en wat deur ervaring geoefen is om tussen goed en kwaad te onderskei.

6 Laat ons nie stilstaan by die eerste dinge wat aangaande Christus verkondig word nie, maar verder gaan na die volle inhoud van die boodskap. Ons wil nie opnuut die fondament lê deur te praat oor die bekering uit 'n leefwyse wat tot die dood lei nie, of oor geloof in God, ² die leer van die doop en die handoplegging, die opstanding van die dooies en die ewige oordeel nie. ³ Ons sal dus verder gaan as God dit toelaat.

Dit gaan vanoggend oor geestelike groei. Wat is geestelike groei? Geestelike groei is om stelselmatig al die wonderlike geskenke wat God vir ons in die trommel as 't ware ingepak het, uit te pak en in ons lewens in te bou. God wil so baie vir ons gee! Al wat ons moet doen is om dit te ontvang en te gebruik.

Wat is die pad wat ons moet loop as ons geestelike wil groei. Ek wil graag 'n paar bakens inkap.

Eerste baken: Vind jou diepste sekuriteit in God

Ons is geneig om ons sekuriteit in alles behalwe God te probeer vind: geld en besittings, roem en erkenning, status en posisie, ander mense se liefde en aanvaarding. Ons ontwikkel geluksprogramme rondom

hierdie dinge. Dit word die fokus van ons lewens en ons drome en ons strewes.

God is egter die enigste vaste, standhoudende bron van sekuriteit. Geluksprogramme wat rondom enige iets anders as God gebou word, is gedoem tot mislukking.

Ongelukkig skram ons weg van God af. Ons is dalk kwaad vir Hom, of ons vrees Hom. Dit is egter glad nie nodig nie. Ons moet Hom ontdek as 'n genadige, liefdevolle Vader wat ons onvoorwaardelike liefhet en dag tot dag vir ons sorg. Siekte, teenspoed, selfs die dood, kan ons nie van sy liefde vir ons skei nie. (Rom 8)

Tweede baken: Vind 'n tuiste in 'n geloofsgemeenskap

Vir 'n plant of 'n blom om te kan ontkiem en groei en uiteindelik te blom, moet dit in 'n vrugbare bedding geplant wees – met net die regte hoeveelheid plantvoedsel en water en sonlig. Om geestelik te kan groei moet ons ook in so 'n vrugbare bedding geplant wees. Daar moet net die regte hoeveelhede van alles wees wat nodig is om geestelik te kan groei. So 'n vrugbare teelaarde vir geestelike groei is: geloofsgemeenskap.

Die mens is nie gemaak om alleen te wees nie. (Gen 2:18-19) God voeg gelowiges in 'n gemeenskap saam sodat hulle mekaar kan ondersteun, mekaar kan help, mekaar kan troos en bemoedig en mekaar op die regte pad kan hou. Geestelike groei buite so 'n geloofsgemeenskap is bykans onmoontlik. In 'n

geloofsgemeenskap slyp ons mekaar en "spoor ons mekaar aan tot liefde en goeie dade."

Derde baken: Begin om in 'n noue en intieme verhouding met God te leef

Om in so 'n verhouding te kan leef moet gebed die skering en inslag van ons lewens wees. Ons hele lewe moet 'n lewe van gebed wees en elke dag moet omhul wees deur gebed.

- Aanbidding
- Voorbidding
- Belydenis
- Danksegging

Gebed van die Hart

Hiermee saam moet ons ook ander geestelike dissiplines beoefen:

- Stilte en afsondering (retraits)
- Skriflesing en nadenke (persoonlike stiltetyd)
- Aanbidding en lofprijsing (erediens e.a. soortgelyke geleenthede)

Vierde baken: Ontwikkel die hart van 'n dienskneg

'n Mens is geneig om op hom/haarself ingestel te wees. Mense se eie belange, eie begeertes en eie strewes staan normaalweg voorop in elkeen se lewe. Dis natuurlik nie goed nie, maar dis nie ongewoon nie. Dit is 'n geneigdheid wat in elkeen van ons is. Maar vir geestelike groei, is dit teenproduktief.

Met ander woorde: Ons selfsug en selfgerigtheid staan in die pad van geestelike groei.

Hy wil ons stelselmatig losmaak van onself sodat ons gereed kan wees om te ontvang. As ons met arms vol van ons eie goed staan – hoe kan God dan vir ons gee wat Hy graag vir ons wil gee?

Daarom roep Jesus ons om onself te verloën (en ons kruis op te neem en Hom te volg) sodat ons eerder kan fokus op God belange, begeertes en strewes. Ware lewensgeluk lê nie op die weg van die vervulling van eie begeertes en strewes nie. Dit is waarom Jesus dan ook sê: as jy jou lewe wil behou (d.w.s. as jy aanhou om selfgerig en selfsugtig te lewe), dan sal jy dit verloor; maar as jy jou lewe weggee in diens van God en die evangelie, sal jy dit behou.

Nadat Jesus sy dissipels se voete gewas het, sê Hy: "Ek het vir julle 'n voorbeeld gestel, en soos Ek vir julle gedoen het, moet julle ook doen." (Joh 13:15)

Hoe ontwikkel ons 'n diensknegingesteldheid?

En nou doen ek 'n beroep op julle, broers, op grond van die groot ontferming van God: Gee julleself aan God as lewende en heilige offers wat vir Hom aanneemlik is. Dit is die wesentlike van die godsdiens wat julle moet beoefen.

Ons besef dat dit in hierdie lewe (hierdie een wat ons op aarde het!), nie gaan oor onself nie. God het ons spesiaal gevorm in die moederskoot en ons toegerus met 'n unieke samestelling van persoonlikheid, talente,

vermoëns. Dit het Hy gedoen omdat Hy ons op die aarde wou plaas met 'n spesifieke doel. Elkeen van ons het 'n unieke lewensroeping. En ons is veronderstel om God se diensknegte te wees deur hierdie unieke lewensroeping na te streef – dit wat Hy graag wil hê ons moet doen. Hierdie spesiale, unieke wese wat God gevorm het en vir 'n spesifieke doel op aarde geplaas het, is die *ware jy*.

Julle moenie aan hierdie sondige wêreld gelyk word nie,

Die *ware jy* in die meeste mense se gevalle baie diep begrawe is en dat dit die gevaar loop om te versmoor. Dit is omdat ons "aan die sondige wêreld gelyk word". Hoe word ons aan die sondig wêreld gelyk? Wat gebeur is dit: sodra hierdie unieke, wonderlike wese wat God gemaak het vir 'n spesifieke doel, gebore word, dan begin die wêreld en die mense in die wêreld hulle (daardie amorfte hulle!) invloed op jou uitoefen. Hulle doen dit subtiel én minder subtiel maar die boodskap wat jy ontvang is duidelik: *Ons sal jou slegs aanvaar / vir jou lief wees / van jou hou / respek hê vir jou / jou ag, as jy: presteer op 'n bepaalde gebied, ryk is, mooi besittings het, BMW, Mercedes; nié Ford(!) ens. ens.* Die gevolg hiervan is dat ons ons *ware self* wegsteek (want die wêreld hou nie daarvan nie) agter 'n masker. Ons ontwikkel 'n valse persoonlikheid (persona = masker). Wat nou na vore kom in die plek van die *ware jy* is 'n *valse jy* met valse begeertes, valse strewes, valse waardestelsel ens.

maar laat God julle verander deur julle denke te vernuwe.

Derdens moet ons begryp dat die ontdekking van die ware jy – en daarmee saam die ontdekking van ons unieke lewensroeping 'n proses gaan verg.

Die proses van ontwikkeling van 'n selfsugtige en 'n selfgerigte ingesteldheid na die ingesteldheid van 'n dienskneg, behels verandering en vernuwing.

Dan sal julle ook kan onderskei wat die wil van God is, wat vir Hom goed en aanneemlik en volmaak is.

As jy jou ware self ontdek het, en die hart van 'n dienskneg ontwikkel het, is jy baie naby daaraan om jou unieke lewensroeping te ontdek – wat God wil hê jy moet doen.

Vyfde baken: Verkoop jousef uit aan God se droom (Wees gehoorsaam aan jou unieke lewensroeping)

Wanneer jy jousef vir God gegee het, wanneer jy toegelaat het dat Hy jou valse self afstroop deur jou denke te vernuwe en te so te verander, wanneer jy dan onderskei het wat sy wil vir jou lewes is, dan begin Hy jou gebruik – dan begin Hy om sy planne, sy doelwitte, sy drome deur jou te verwesenlik. Hy begin jou nou gebruik vir die doel waarvoor Hy jou geskep het.

Ons kom hier by dié punt waar ons besef dat ons regtig net bywoners en vreemdelinge op aarde is. Ons is hier – tydelik – maar met 'n spesifieke doel (roeping). Ons is diensknegte – diensknegte leef nie vir hulleself nie maar die Een wat hulle dien.

Dis hier waar God se droom ons werklik begin beetpak. Wanneer ons onself uitverkoop aan God se droom. God se droom behels 'n stukkende wêreld wat heilgemaak word. Jes 25 (Jesus sluit baie nou aan by Jesaja)

⁶ *Op hierdie berg gaan die Here die Almagtige 'n feesmaal gereed maak vir al die volke, 'n feesmaal met die beste om te eet en te drink, goeie kos en geurige wyn.* ⁷ *Op hierdie berg sal Hy die doek verwyder, die doek wat oor al die volke gegooi was, waarmee al die nasies toegemaak was.* ⁸ *Hier sal die Here God die dood vir ewig vernietig, en die trane op almal se gesigte afvee.*

Die woorde van die Ou Testamentiese profeet word ge-eggo in die Nuwe Testament:

Toe het ek 'n nuwe hemel en 'n nuwe aarde gesien. Die eerste hemel en die eerste aarde het verdwyn, en die see het nie meer bestaan nie. ² *En ek het die heilige stad, die nuwe Jerusalem, van God af uit die hemel uit sien afkom. Die stad was gereed soos 'n bruid wat vir haar man versier is.*

³ *Toe het ek 'n harde stem van die troon af hoor sê: "Kyk, die woonplek van God is nou by die mense. Hy sal by hulle bly; hulle sal sy volke wees, en God self sal by hulle wees as hulle God.* ⁴ *Hy sal al die trane van hulle oë afdroog. Die dood sal daar nie meer wees nie. Ook leed, smart en pyn sal daar nie meer wees nie. Die dinge van vroeër het verbygegaan."*

⁵ *Toe sê Hy wat op die troon sit: "Kyk, Ek maak alles nuut."*

Dis hier waar die lewe regtig begin sin maak! Waar die lewe opwindend begin raak! Dis waarom die Here ons wil losmaak van ons eie selfsugtige drome en van die selfsugtige drome van ander mense vir ons – sodat ons kan begin om onself uit te verkoop aan sy droom! Wat gebeur wanneer ons dit doen?

David Bosch (*Transforming Mission*): *Diegene wat weet dat God eendag al die trane sal afdroog, sal nie met gelatenheid die trane van diegene wat nou ly en onderdruk word aanvaar nie. Elkeen wat weet dat daar eendag nie meer siekte sal wees nie moet nou reeds aktief die oorwinning daarvan antisipeer deur siekte in individue en gemeenskappe te beveg. En almal wat glo dat die vyand van God en mens eendag finaal oorwin sal word, sal nou reeds sy bose werkinge in ons gesinne en gemeenskappe beveg.*

Hierdie pad is nie 'n maklik pad nie. Dit is die pad van selfopoffering en selfverloëning. Dit is die pad van 'n dienskneg wat uitverkoop is aan die droom van sy / haar Meester. Maar dit is pad wat lei tot ware selfvervulling. Dit is wanneer ons hierdie pad begin loop dat die lewe regtig begin sin maak. Dan hou ons op om maar net van dag tot dag voort te ploeter en dan begin ons om waarlik te lewe!

Tom Sine (*Wild Hope*): *And yet, although it is God who brings about God's future, we have a role to play as well. Our role doesn't involve taking power, leveraging the market, or pursuing our self-interest. It comes through relinquishing our own agendas and placing God's agenda first. It comes through suffering love and sometimes*

even through death. It comes through our cooperating with the Creator in the birthing of a whole new order.

(253)

For whatever reason, it appears that the Creator God has chosen to work through a new community of broken, recalcitrant human beings to help display and advance something of God's new order. I don't think any of us has fully grasped what God could do to manifest this new order within history if God could secure a little more cooperation from those of us who profess to be followers.

(p245)